

Cumün da Val Müstair



Reglamaint pel provedimaint d'aua

2009

Cuntgnü

I.	General	3
Art. 1	Proprietà dal cumün	3
Art. 2	Proprietà privata	3
Art. 3	Oblig e cumpetenzas dal cumün	3
Art. 4	Dret da condots	3
Art. 5	Condots privats	
II.	Furniziun d'aua	4
Art. 6	Dret da retrar aua	4
Art. 7	Adöver d'aua d'idrants	4
Art. 8	Dret da retrar aua privata	4
Art. 9	S-charsdà d'aua	4
III.	Disposiziuns tecnicas	4
Art. 10	Installaziuns	4
Art. 11	Quintadurs	4
IV.	Taxas d'aua	5
Art. 12	Finanziaziun e taxas d'adöver	5
V.	Disposiziuns penalas e finalas	5
Art. 13	Excepziuns e resalvas da ledschas federalas / chantunalas	5
Art. 14	Dret da recuors	5
Art. 15	Chastis	5
Art. 16	Entrada in vigur	5

I. GENERAL

Art. 1 Proprietà dal cumün

1. Tuot las funtaunas sül territori dal cumün, exclus funtaunas sül territori privat.
2. Tuot ils flüms, auals ed auas da fuond chi creschan sün territori cumünal.
3. Ils condots d'aua principals, saja quai sur o suot terra, sainza resguard sülla proprietà dal terrain, cumprais vascas, portellas principalas e posts d'idrants, però sainza vascas e portellas d'attachs privats.
4. Tuot ils quintadurs d'aua installats aint ils abitaculs in Val Müstair.
5. Ils bügls publics, inclus ils condots.

Art. 2 Proprietà privata

In proprietà privata es il condot davent da la rait principala, inclus la portella, fin pro la chasa. Implü tuot las installaziuns internas, exclus il quintadur.

Art. 3 Oblig e cumpetenzas dal cumün

Il cumün es responsabel per la construcziun e'l mantegnimaint da la rait d'aua principala tenor ils credits acconsentits da la radunanza cumünala o da la suprastanza.

Art. 4 Dret da condots (Durchleitungsrecht)

1. Condots publics vegnan construits per regla sün terrain cumünal, tenor plans da zonas e plans da quartier.
2. Sto gnir traversà cun condots terrain privat, averts o serrats, sto il proprietari tolerar quist transit sainza dret da far prevalair ün'indemnisaziun.
3. Indemnisats vegnan be dons da racolta, chaschunats tras la construcziun dal condot. La stima sto eseguir tras l'ufficiant cumünal responsabel per las surfatschas d'agricultura.
4. Il dret da transit cun condots publics sto gnir portà aint il cudesch fundiari.
5. Il cumün es in oblig da translocar ils condots publics, scha quels impedischan fabricats privats.

Art. 5 Condots privats

1. Condots privats sun da construir tenor las prescripziuns dal cumün. Tal fixa ils lös d'attach, la dimensiun sco eir il lö dal quintadur.
2. Ils cuosts per l'erecziun e'l mantegnimaint van a charg dal privat (proprietari).
3. Ils proprietaris da condots privats sun obliats da permetter ad oters l'attach vi da lur condot cunter indemnisaziun adequata.
4. Il cumün po surtour ün condot privat cun tuot seis indrizs in aigna proprietà cunter indemnisaziun adequata.
5. Il privat es oblià da mantgnair seis condots inclus la portella. Pro renovaziuns da las lingias principalas ston eir ils condots privats gnir examinats e schi fa dabsögn renovats.

II. FURNIZIUN D'AUA

Art. 6 Dret da retrar aua

Chasas existentas han il dret da retrar aua da baiver e quai per ün adöver normal. Bea-
mains nouvs s'acquistan quist dret cul permiss da fabrica e'l pajamaint da la taxa d'attach.

Art. 7 Adöver d'aua d'idrants

Id es scumondà da far adöver dals idrants. Per cas motivats ed urgients po l'uffizi da fabrica
dar ün permiss special, cunter pajamaint, tenor regulativ da taxas. Per eventuais dons
chaschunats tras quist adöver vain fat respunsabel il privat. Priorità ha però adüna l'aua da
baiver e la reserva da fö.

Art. 8 Dret da retrar aua privata

Il dret da retrar aua privata our da funtaunas o aua da fuond sto gnir acconsenti dal cumün e
dal Chantun. La qualità d'aua ha da gnir examinada da l'uffizi per la sgürezza da victualias
dal Chantun Grischun. Tuot las spaisas van a charg dal privat.

Art. 9 S-charsdà d'aua

Il cumün po relaschar masüras per restringer il consüm d'aua scha la situaziun pretenda. Pro
installaziuns privatas, chi nu correspuondan a las normas o chi nu vegnan mantgnüdas, po il
cumün scumandar il retrar d'aua.

III. DISPOSIZIUNS TECNICAS

Art. 10 Installaziuns

1. Attachs ed installaziuns das-chan be gnir fats tras perits. Las directivas per l'igiene d'aua
da baiver, relaschadas da la società Svizra da l'associaziun da gas ed aua (SVGW) sun
impegnativas. Il medem vaglia pro l'adöver da materials nouvs.
2. Pro attachs davent da la rait principala esa d'installar üna portella e da marcar tala. Avant
co cuvernar il s-chav d'ün condot sto quel gnir controllà dal cumün. Il condot sto gnir
construi per üna pressiu d'almain 15 bar. La cuvrida dal condot sto gnir fatta seguond las
directivas da l'uffizi da fabrica.

Art. 11 Quintadurs

Tuot il consüm d'aua ha da gnir retrat sur quintadurs d'aua chi vegnan miss a disposiziun dal
cumün. Els han da gnir installats seguaintamaing:

- da möd chi's riva pro sainza impedimaints
- avant il quintadur es da montar üna spina principala

Als funcziunaris cumünals esa adüna da pussibilitar l'access pro'l quintadur. Naschan dons vi dal quintadur causa negligenza dal privat es tal respunsabel e sto portar las malaspaisas.

IV. TAXAS D'AUA

Art. 12 Finanziaziun e taxas d'adöver

Per la finanziaziun dal provedimaint d'aua preleva il cumün taxas. Quistas vegnan prelevadas seguond ün regulativ separà.

V. DISPOSIZIUNS PENALAS E FINALAS

Art. 13 Excepziuns e resalvas da ledschas federalas / chantunalas

La suprastanza cumünala es autorisada da far excepziuns da quist reglamaint, scha cas da dürezza pretendan quai. Disposiziuns federalas e chantunalas restan resalvadas.

Art. 14 Dret da recuors

Cunter disposiziuns da la suprastanza cumünala po gnir tut recuors infra 20 dis pro'l güdisch administrativ dal Chantun Grischun.

Art. 15 Chastis

Surpassamaints da quist regulativ vegnan chastiat tras la suprastanza cumünala cun multas fin à fr. 10'000.-- Implü esa da refer o d'indemnisar tuot ils dons occasionats tras tals surpassamaints.

Art. 16 Entrada in vigur

Cun l'acconsentimaint da la radunanza cumünala aintra quist reglamaint in vigur, e quai retroactiv süls 01.01.2009.

Approvà da la radunanza cumünala dals 26.06.2009

Il president cumünal,

Arno Lamprecht

Il chanzlist,

Not Manatschal